

四庫全書

史部

欽定四庫全書

元史卷一百二

明翰林學士亞中大夫知制誥兼修國史宋濂等修

志第五十

刑法

自古有天下者雖聖帝明王不能去刑法以為治是故
道之以德義而民弗從則必律之以法法復違焉則刑
辟之施誠有不得已者是以先王制刑非以立威乃所

以輔治也故書曰士制百姓于刑之中以教祇德後世
專務黷刑任法以為治者無乃昧于本末輕重之義乎
歷代得失考諸史可見也元興其初未有法守百司斷
理獄訟循用金律頗傷嚴刻及世祖平宋疆理混一由
是簡除繁苛始定新律頒之有司號曰至元新格仁宗
之時又以格例條畫有關於風紀者類集成書號曰風
憲宏綱至英宗時復命宰執儒臣取前書而加損益焉
書成號曰大元通制其書之大綱有三一曰詔制二曰條

格三曰斷例凡詔制為條九十有四條格為條一千一百五十有一斷例為條七百十有七大凡纂集世祖以來法制事例而已其五刑之目凡七下至五十七謂之笞刑凡六十七至一百七謂之杖刑其徒法年數杖數相附麗為加減鹽徒盜賊既決而又錄之流則南人遷于遼陽迤北之地北人遷于南方湖廣之鄉死刑則有斬而無絞惡逆之極者又有凌遲處死之法焉蓋古者以墨劓剕宮大辟為五刑後世除肉刑乃以笞杖徒

流死則備五刑之數元因之更用輕典蓋亦仁矣世祖謂
宰臣曰朕或怒有罪者使汝殺汝勿殺必遲回一二日
乃覆奏斯言也雖古仁君何以過之自後繼體之君惟
刑之恤凡郡國有疑獄必遣官覆訊而從輕死罪審錄
無寃者亦必待報然後加刑而大德間王約復上言國
朝之制笞杖十減為七今之杖一百者宜止九十不
當又加十也此其君臣之間唯知輕典之為尚百年之
間天下又寧亦豈偶然而致哉然其弊也南北異制事

類繁瑣挾情之吏舞弄文法出入比附用譎行私而克
頑不法之徒又數以赦宥獲免至于西僧歲作佛事或
恣意縱囚以售其奸宄俾善良者喑啞而飲恨識者病之
然則元之刑法其得在仁厚其失在乎緩弛而不知檢
也今按其實條例而次第之使後世有以考其得失作
刑法志

名列

五刑

笞刑

七下

十七

二十七

三十七

四十七

五十七

杖刑

六十七

七十七

八十七

九十七

一百七

徒刑

一年

杖六十七

一年半

杖七十七

二年

杖八十七

二年半

杖九十七

三年

杖一百七

流刑

遼陽

湖北

迤北

死刑

斬

凌遲處死

五服

斬衰

三年

杖期

期

五月

三月

子為父婦為夫之父之類

齊哀

三年

杖期

期

五月

三月

子為母婦為夫之母之類

大功

九月

長殤九月

中殤七月

為同堂兄弟為姑母妹適人者之類

小功

五月

殤

為伯叔祖母為從兄弟之類

緦麻

三月

為族兄弟為族曾祖父母之類

十惡

謀反

謂謀危社稷

謀大逆

謂謀毀宗廟山陵及宮闕

謀叛

謂謀背國從偽

惡逆

謂毆及謀殺祖父母父母殺伯叔父母姑兄弟外
祖父母夫夫之祖父母父母之類

不道

謂殺一家非死罪三人及支解人造畜蠱毒壓魅
大不敬

謂盜大祀神御之物乘輿服御之物及偽造御寶
合和御藥誤不如本方及封題誤若造御膳誤犯
食禁御幸舟船誤不牢固拍斥乘輿情理切害及

對捍制使而無人臣之禮

不孝

謂詈言詛盟祖父母父母及祖父母父母在別籍異財若供養有闕居父母喪身自嫁娶若作樂釋服從吉聞祖父母父母喪匿不舉哀詐稱祖父母父母死

不睦

謂謀殺及賣總麻以上親毆告夫及大功以上尊長小功尊屬

不義

謂殺本屬府主刺史縣令見受業師吏卒殺本部
五品以上官長及聞夫喪匿不舉哀作樂釋服從
吉及改嫁

內亂

謂姦小功以上親父祖妾及與和者

議親

謂皇帝袒免以上親及太皇太后皇太后總麻以

上親皇后小功以上親

議故

謂故舊

議賢

謂有大德行

議能

謂有大才業

議功

謂有大功勲

議貴

謂職事官三品以上散官二品以上及爵一品者

議勤

謂有大勤勞

議實

謂承先代之後為國實者

贖刑

附

諸牧民官公罪之輕者許罰贖

諸職官犯夜者贖

諸年老七十以上年幼十五以下不任杖責者贖

諸罪人瘡篤殘疾有妨科決者贖

衛禁

諸掌宿衛三日一更直掌四門之鑰昏閉晨啟毋敢不
慎 諸欲言事人闌入宮殿呼冀上聞杖一百七發元
籍 諸擅帶刀闌入殿廷者杖八十七流遠 諸登皇

城角樓因為盜者處死

諸闌入禁衛盜金玉寶器者

處死

諸輒入禁苑盜殺官獸者為首杖八十七徒二

年為從減一等並刺字知見不首者笞四十七掌門衛
受財縱放者五十七坐鋪守把軍人不訶問二十七

諸漢人南人投充宿衛士總宿衛官輒收納之並坐罪

諸大都上都諸城門夜有急務湏出入者遣官以夜

行象牙圓符及織成聖旨啟閉門尉辯驗明白乃許啟

雖有牙符而無織成聖旨者不論何人並勿啟違者處

死

職制上

諸官府印章長官掌收次官封之差故即以牒發次官
次其下者第封之不得付其私人 諸郡縣城門鎖鑰
並從有司掌之 諸有司凡薦舉刑名出納等文字非
有故並須圓署行之 諸職官到任距上司百里之內
者公叅百里之外者免上司輒非理徵會稽失公務者
禁之 諸內外百司呈署文字並須由下而上論定而

後行之 諸省府以下百司凡行公務置朱銷簿按治
官以時考之 諸職司公坐同職者以先到任居上輒
越次而坐者正之 諸有司公事各官連銜申稟其上
司者並自書其名有故從對讀首領官代書之具述其
故于名下曹吏輒代書其名者罪之 諸職官受代聽
除之處從所便具載解由私赴都者禁之 諸有司案
牘籍帳編次架閣各路提控案牘並架閣庫官與經歷
知事同掌之散府州縣知事提舉案牘都吏目典史掌

之任滿相沿交割毋敢不慎 諸樞密院行省文卷除
軍數及邊關兵機不在考閱餘並從監察御史考閱之
諸職官承上司他委所治闕官者許回申不得擅令
首領官吏攝事 諸職官押運官物赴都除常所不差
者餘並置籍輪差徇私不均者罪其上司 諸吏員遷
調廩訪司書吏奏差避道路府州縣吏避貫 諸有司
遺失印信隨即尋獲者罰俸一月追尋不獲者具申禮
部別鑄元掌印官解職坐罪非獲元印不得給由求叙

諸毀匿邊關文字者流 諸蒙古人居官犯法論罪
既定必擇蒙古官斷之行杖亦如之 諸四集賽及諸
王駙馬蒙古色目之人犯姦盜詐偽從大宗正府治之
諸以親女獻當路權貴求進用已得者追奪所受命
仍沒入其家 諸官吏在任與親戚故舊及理應追往
之人追往者聽餘並禁之 諸職官到任輒受所部執
見儀物比受賦減等論 諸職官受部民事後致謝食
用之物者笞二十七記過 諸上司及出使官于使所

受其燕享餽遺者准不枉法減二等論經過而受者各減一等從臺憲察之 諸職官及有出身人因事受財

枉法者除名不叙不枉法者殿三年再犯不叙無祿者減一等以至元鈔為則枉法一貫至十貫笞四十七不滿貫者量情斷罪依例除名一十貫以上至二十貫五十七二十貫以上至五十貫杖七十七一百貫之上一百七不枉法一貫至二十貫笞四十七本等叙不滿貫者量情斷罪解見任別行求仕二十貫以上至五十貫

五十七注遶遠一任五十貫以上至一百貫杖六十七
降一等一百貫以上至一百五十貫七十七降二等一
百五十貫以上至二百貫八十七降三等二百貫以上
至三百貫九十七降四等三百貫以上一百七除名不
叙諸內外百司官吏受賊悔過自首無不盡不實者
免罪有不盡不實止坐不盡之賊若知人欲告而首及
以贓還主並減罪二等聞知他處事發首者計其日程
雖不知亦以知人欲告而首論詭名代首者勿聽犯人

實有病故許親屬代首臺憲官吏受贓不在准首之限
有司受人首告者罪之 諸職官恐嚇有罪人求賂未

得財者笞二十七 諸告官吏贓有實取之者有為過

度人所諱而官吏初不知者有官吏已知而姑付過度
之家事畢而後取之者有本未嘗言而故以錢物置人
家指作過度而誣陷人者止以錢物所在坐之與錢人
俱坐 諸職官但犯贓私有罪狀明白者停職聽斷

諸奴賤為官但犯贓罪除名 諸職官犯贓生前贓狀

明白雖死猶責家屬納贓 諸官吏犯贓罪遇原免或
自首免罪過錢人即因人致罪不坐 諸官吏贓罰臺
官問者歸臺省官問者歸省 諸職官犯贓罪狀已明
反誣告臨問官者斷後仍徒 諸官吏家人受贓減官
吏法二等坐官吏初不知及知即首官吏家人俱免不
即首官吏減家人法二等坐家人依本法若官吏知情
故令家人受財官吏依本法家人免坐官吏實不知者
止坐家人 諸職官受除未任因承差而犯贓者同見

任論邊遠遷轉官已任而未受文憑犯賊者亦如之吏
未出職受賊者出職事發罷所受職 諸錢穀官吏受
贓不枉法者止計贓論罪不殿年叙 諸職官受贓聞
知事發回付到主同知人欲告自首論減二等科罪枉
法者降先職三等叙不枉法者解職別叙 諸職官侵
用官錢者以枉法論雖會赦仍除名不叙 諸職官在
任犯贓被問贓狀已明而稱疾者停其職歸對 諸職
官所將親屬僉從受所部財而無入己之贓會赦還職

諸外任牧守受賊被問垂成近臣奏徵入朝者執付元問官 諸職官犯賊在逃者同獄成 諸職官受賊

丁憂終制日究問軍官不丁憂者不在終制之限 諸

職官犯賊已承伏會赦者免罪徵賊黜降如條未承伏

者勿論 諸職官受賊即改悔還主其主猶執告者勿

論 諸職官受財為人請託者計賊論罪 諸小吏犯

賊並斷罪除名 諸庫子等職已有出身無添給祿米

者不與小吏犯賊同論 諸掾吏出身應入流或以職

官轉補但犯贓並同吏員坐除名府州縣首領官非朝
命者同吏員 諸吏員取受非真犯者不除名 諸流
外官越受民詞者笞一十七首領官二十七記過 諸
臨民官于無職田州縣虛徵其入于民者斷罪解職記
過 諸職司頻入茶酒市肆及倡優之家者斷罪罷職
諸監臨官私役弓手笞二十七三名已上加一等占
騎弓手馬笞一十七並記過各本管官吏輒應付者各
減一等 諸内外官吏稱疾病滿百日者作闕期年後

任諸職官連犯二罪輕罪已斷重罪始發罪從已斷殿降
從後發諸有過被問詐死逃罪者杖六十七有官
者罷職不叙賊多者從重論諸行省以下大小司存
長官非理折辱其首領官者禁之首領官有過失聽申
上司不得擅問長官處決不公首領官執覆不從許直
申上司諸隨朝官無故不公聚者坐罪選待諸職
官已受宣勅以地遠官卑輒稱故不赴者奪所受命謫
種田或在任詐稱病而去者三年後降二等叙其同僚

徇私與文書者降一等叙 諸受命職官闕期已及
或有辨證勾稽喪葬疾病公私諸務妨阻不能之任者
具始末詣本處有司自陳保勘給據再叙並任元注地
方有司保勘不實者並坐之 諸受除官員闕次未及
輒先往任所居住守代者從本管上司究之 諸各衙
門輒將聽除及罷閑無祿私已之人差遣者禁 諸職
官親死不奔喪杖六十七降先職二等雜職叙未終喪
赴官筭四十七降一等終制日叙若有罪詐稱親喪杖

八十七除名不叙親久沒稱始死笞五十七鮮見任雜
職叙凡不丁父母憂者罪與不奔喪同 諸官吏私罪
被逮無問已招未招罹父母大故者聽其奔赴丁憂終制
日追問公罪並矜恕之 諸職官父母亡匿喪縱宴樂
遇國哀私家設音樂並罷不叙 諸外任官員謁告應
有假故具實狀報所屬仍置籍以記之有託故者風憲
官糾而罪之 諸官吏遷葬祖父母父母給假二十
日並除馬程日七十里限內俸錢仍給之違限不至者

勒停 諸職官任滿解由應給而不給不應給而給及
有過而不開寫者罪及有司解由到部增損功罪不以
實者亦如之 諸罷免官吏叙復給由而匿其過名者
罪及初給由有司 諸匿過求仕已除事覺者笞四十
七追奪不叙 諸職官年及致仕而不知止者廉訪司
糾黜之 諸職官被罪理算殿年以被問停職月日為
始 諸遠方官員親年七十以上者許元籍有司保勘
量注近闕便養冒濫者坐罪 諸職官沒於王事者其

應繼之人降二等蔭叙 諸內外百司五品以上進上表章並以蒙古字書毋敢不敬仍以漢字書其副 諸內外百司凡進賀表箋繕寫謄籍印識各以式其輒犯廟諱御名者禁之 諸內外百司應出給劄付有額設譯史者並以蒙古字書寫 諸內外百司有兼設蒙古回回譯使者每遇行移及勘合文字標譯關防仍兼用之 諸內外百司公移尊卑有序各有定制惟執政出典外郎申部公文書姓不書名 諸人臣口傳聖旨行

事者禁之 諸大小機務必由中書惟樞密院御史臺
徽政宣政諸院許自言所職其餘不由中書而輒上聞
既上聞而又不由中書徑下所司行之者以違制論所
司亦不稟白而輒受以行之者從監察御史廉訪司糾
之 諸中書機務有泄其議者量所泄事聞奏論罪

諸省部官名隸宿衛者畫出治事夜入番直 諸檢校
官勾檢中書及六曹之務其有稽違省掾呈省論罰部
吏就錄罪名開呈 諸行省擅役軍人營繕雖公廨不

奏請猶議罪 諸行省擅役軍人非軍情者禁之 諸
行省長官二員給金虎符典軍惟雲南行省官皆給符
諸各處行省所轄軍官軍情怠慢從提調軍馬長官
斷遣其餘雜犯受宣官以上皆稟受勅官以下就斷
諸行省歲支錢糧各處正官季一照勘歲終會其成
行省以式稽考濫者徵之實者籍之總其聚咨都省臺
憲官閱實之 諸方面大臣受金縱賊成亂者斬其佐
受金或阿順不能匡正並坐罪會赦仍除名 諸樞密

院及各省所部軍官其麾下征者戍者出者處者饑寒
不贍役使不均代以私人舉債倍息在家曰逃有力曰
乏惟單窮是使惟貨賄是圖以苦士卒以耗兵籍百戶
有罪罪及千戶千戶有罪罪及萬戶萬戶有罪從樞密
院及行省帥府以其狀聞隨事論罪 諸宣徽院所抽
分馬牛羊官嚴其程期制其供億謹其鈐束之法以譏
察之其有欺官擾民者廉訪司糾之 諸翰林院應譯
寫制書必呈中書省共議其橐其文卷非邇遠軍情重

事並從監察御史考閱之 諸宣政院文卷除修佛事不在照制外其餘文卷及所隸內外司存並照刷之

諸徽政院及齊哩克昆人舊設諸府司文卷並從臺憲照刷 諸臺官職掌飭官箴稽吏課內秩羣祀外察行人與聞軍國奏議理達民庶冤辭凡有司刑名賦役銓選會計調度徵收營繕勘審訊勾稽及庶官廉貪厲禁張弛編民悖獨流移強暴兼并悉糾舉之 諸行臺官主察行省宣慰司以下諸軍民官吏之作姦犯科者

窮民之流離失業者豪强家之奪民利者按察官之不稱職任者餘視內臺立法同 諸御史臺所轄各道憲司民有寃滯赴愬於臺者咸著于籍歲終則會以考其各道之殿最而黜陟之 諸臺憲所察天下官吏贓污欺詐稽違罪入於刑書者歲會其數及其罪狀上之藏於中書 諸內外臺歲遣監察御史刷磨各省文卷并察各道廉訪司官吏贓否官弗稱者呈臺黜罰吏弗稱者就罷之 諸風憲薦舉必考其最績彈劾必著其罪

狀舉劾失當並坐之

諸殿中侍御史凡遇廷臣奏事

必隨入內在廷有不可與聞之人即糾斥之朝會祭祀一切行禮失儀越次及託故不至者即糾罰之文武百官謁假事故三日以外者以曹狀報之凡官府鞫置百官禮任事被差往還報曹狀並同 諸廉訪分司官每季孟夏初旬出錄囚仲秋中旬出按治明年孟夏中旬還其憚遠違期託故避事者從監察御史劾之 諸廉訪司分巡各路軍民官吏有過得罪狀明白者六品以

下牒總司論罪五品以上申臺聞奏 諸廉訪司官擅
封點軍器庫者笞三十七解職別叙 諸官吏受賊事
主雖不告言監察御史廉訪司察之實者糾之 諸行
省官及首領官受賂隨省廉訪司察知者上之臺已下
就問 諸行省理問所見問公事廉訪司輒逮問者禁
之 諸職官受賊廉訪司必親臨聽決有必不能親臨
者摘敵品有司老成廉能正官問之 諸被按官吏有
冤抑者詣御史臺陳理所言實罪被告所言虛罪告者

仍加等其有故撫按問官吏以事者禁之 諸按問職

官賊毋遽施刑惟衆證已明而不款伏者加刑問之軍

官則先奪所佩符而問之 諸風憲官吏但犯賊加等

斷罪雖不枉法亦除名 諸方面之臣入覲輒斂所部

官吏俸錢備禮物者禁之違者罪之 諸湖南北江西

兩廣接境溪洞蠻獠竊發諸監臨禁治不嚴及故縱者

軍官笞三十七管民官二十七並削所受階一等記過

諸邊隅鎮守不嚴他盜輒入境殺掠者軍官坐罪民

官不坐 諸軍民官鎮撫邊陲三年無囂聚之盜者民
官減一資軍官陞散官一階五年無者軍民官各陞散
官一等 諸郡縣版籍所司謹度置之正官相沿革之

諸勸農官每歲終則上其所治農桑水利之成績於
本屬上司本屬上司會所部之成績以上于大司農若
部部考其勤惰成否以上于省而殿最之其在官怠其
事隳其法者罪之 諸職官行田受民戶齊斂錢者以
一多科斷 諸受財占民差徭者以枉法論 諸額課

所在管民正官董其事若以他故出次官通攝之 諸
額收錢糧各處計吏歲一詣省會之有齊斂者從案治
官舉劾 諸郡縣歲以三限徵收稅糧初限十月終中
限十一月終末限十二月終違者初限笞四十再犯杖
八十但結攬及自願與結攬人等並沒入其家財仍依
元科之數倍徵之若不差正官部糧而以權官部之或
致失陷及輸不足者達嚕噶齊管民官同坐 諸州縣
義倉糧數不實監臨失舉察者罪之 諸職官於禁刑

之日決斷公事者罰俸一月吏笞二十七記過 諸有
司斷諸小罪輒以杖頭非法杖人致死罪坐判署官吏
諸曾訴官吏之人有罪其被訴官吏勿推 諸有司
輒憑妄言惟薄私事逮繫人者笞四十七解職期年後
叙 諸職官得代及休致凡有追奪並同見任其婚姻
田債諸事止於子孫弟姪陳訴有司輒相侵凌者究之
諸職官告吏民毀罵非親聞者勿問違者罪之 諸
職官聽訟者事關有服之親并婚姻之家及曾受業之

師與所讐嫌之人應回避而不迴避者各以其所犯坐之有輒以官法臨決尊長者雖會赦仍解職降叙諸有司事關蒙古軍者與管軍官約會問諸管軍官鄂囉官及鹽運司打補鷹坊軍匠各投下管領諸色人等但犯強竊盜賊偽造寶鈔畧賣人口發塚放火犯姦及諸死罪並從有司歸問其鬪訟婚田良賤錢債財產宗從繼絕及科差不公自相告言者從本管理問若事關民戶者從有司約會歸問並從有司追還三約不至者

有司就便歸斷 諸州縣鄰境軍民相關詞訟元告就被論官司歸斷不在約會之例斷不當理許赴上司陳訴罪及元斷官吏 諸僧道儒人有爭有司勿問止令三家所掌會問 諸哈達大師止令掌教念經回回人應有刑名戶婚錢糧詞訟並從有司問之 諸僧人但犯姦盜詐偽致傷人命及諸重罪有司歸問其自相爭告從各寺院住持本管頭目歸問若僧俗相爭田土與有司約會約會不至有司就便歸問 諸各寺院稅糧

除前宋所有常住及世祖所賜田土免納稅糧外已後
諸人布施并已力典賣者依例納糧 諸管民官以公
事攔所部並用信牌其差人擾衆者禁之 諸掩骼埋
骸有司之職或饑歲流莩或中路暴死無親屬收認應
聞有司檢覆者檢覆既畢就付地主鄰人收葬不須檢
覆者亦就收葬 諸救災卹患鄰邑之禮歲飢輒閉糴
者罪之 諸郡縣災傷過時而不申或申不以實及按
治官不以時檢踏皆罪之 諸蟲蝗為災有司失捕路

官各罰俸一月州官各笞一十七縣官各二十七並記
過 諸水旱為災人民艱食有司不以時申報賑卹以
致轉徙饑莩者正官笞三十七佐官二十七各解見任
降先職一等叙 諸有司檢覆灾傷或以熟作荒或以
可救為不可救一頃已上者罰俸二十頃已上者笞一
十七二百頃已上者笞二十七五百頃已上者笞三十
七惟以荒作熟抑民納糧者笞四十七罷之託故不行
妨誤檢覆者笞三十七 諸義夫節婦孝子順孫節行

應旌表者從所屬有司舉之監察御史廉訪司察之但有冒濫罪及元舉 諸賜高年帛應受賜而有司不以實報者正官笞四十七解職別叙 諸州縣舉茂異秀才非經監察御史廉訪司體察者不得開申 諸民犯弑逆有司稱故不聽理者杖六十七解見任殿三年雜職叙 諸檢屍有司故遷延及檢覆牒到不受以致屍變者正官笞三十七首領官吏各四十七其不親臨或使人代之以致增減不實移易輕重及初覆檢官相符

同者正官隨事輕重論罪黜降首領官吏各笞五十七
罷之件作行人杖七十七受財者以枉法論 諸有司
在監囚人因病而死虛立檢屍文案及闕覆檢官者正
官笞四十七解職別叙已代會赦者仍記其過 諸職
官覆檢屍傷屍已焚瘞止傳會初檢申詳者解職別叙
若已改除仍記其過 諸藩王及軍馬經過郡縣委積
館勞並許於應給官物內支遣隨申行省知會或擅移
易齊斂者禁之 諸郡縣非遇聖旨令旨諸王鮒馬大

臣經過官吏並免郊迎妨奪公務仍不得贐以錢物按
治官常糾察之 諸職官但犯軍情違誤受勅官各路
就斷受宣官從都省行省處分其餘公罪各路並不得
輒斷 諸部送囚徒中路所次州縣不寄囚於獄而監
收旅舍以致反禁而亡者部送官笞三十七還職本處
防護官笞四十七就責捕賊仍通記過名 諸有司各
處遞至流囚輒主意故縱者杖六十七解職降先品一
等叙刑部記過 諸和顧和買依時置備對物給價官

吏權豪因緣結攬營私害公者罪之 諸有司和買諸物多餘估計分受其價者準盜官錢論不分受以冒估多寡論監臨及當該官吏詭名申納者物價全沒之尅落價鈔者準不枉法贓論不即支價者臺憲官糾之

諸職官輒以親故人事之物為散之民鳩斂錢財者計其時直以餘利為坐減不枉法贓二等科罪錢物各歸其主 諸職官私用民力者笞二十七記過追顧直給其民 諸尅除所屬官吏俸錢為公用及備進上禮物

既去職者並勿論 諸在任官斂屬吏俸贈去官者答
四十七還職 諸職官輒借騎所部內驛馬者答三十
七降先職一等叙記過 諸職官於所部非親故及理
應往復之家輒行慶吊之禮者禁之違者罪之

元史卷一百二

元史卷一百二考證

刑法志一諸官吏在任與親戚故舊及理應追往之人
追往者聽餘並禁之按至正條格至元三十一年
定諸官吏在任部下情禮數除親戚故舊及理應追
往之人外餘皆禁止如違隨其輕重斟酌追斷原刻
理訛禮今據改

欽定四庫全書

元史卷一百三

明翰林學士亞中大夫知制誥兼修國史宋濂等修

志第五十一

刑法二

職制下

諸職官戶在軍籍管軍官輒追逮其身者禁之 諸中外大小軍官不能以法撫循軍人而又害之者從監察

御史廉訪司糾察之行省官及宣慰司元帥府官無故以軍官自衛者亦如之 諸軍官不法各處憲司就問之樞府不得委官同問 諸管軍官輒以所佩金銀符充典質者答五十七降散官一等受質者減二等 諸軍官犯賊應罷職殿降者上所佩符再叙日給之 諸軍官役使軍人萬戶八名千戶減萬戶之半彈壓減千戶之半過是數者坐罪 諸軍官驅役軍人致死非命者量事斷罪並罷職徵燒埋銀給苦主 諸管軍官擅

放正軍及分受雇役錢者以枉法論除名不叙 諸管
軍官吏剋除軍人衣糧鹽菜錢并全未給散會赦剋除
已招者追給未招者免徵未給散者給散其私役軍人
官牛帶種官地并管民官占種官地所收子粒已招者
追沒未招者免徵 諸軍官役其出征軍人家屬又借
之錢而多取息者並坐之 諸軍官輒縱軍人誣民以
罪嚇取錢物而分贓自厚者計贓科罪除名不叙 諸
民間失火鎮守軍官坐視不救而反縱軍剽掠者從臺

憲官糾之 諸軍官輒斷民訟者禁之違者罪之 諸

軍官挾仇犯分輒持刃欲殺連帥者杖六十七解職別

叙 諸投下官吏受賊與常選官同論 諸投下雜職

犯賊罪者罷之不以常調殿降論 諸投下妄稱上旨

影占民站除其徭役故縱為民害者杖七十七沒其家

財之半所占民杖一百七還元籍 諸王傳文卷監察

御史考閱與有司同 諸位下置財賦營田等司歲終

則會會畢從廉訪司考閱之 諸投下輕重囚徒並從

廣訪司審錄 諸藩邸事務大者奏裁小者移中書擅
以教令行者禁之 諸倉庾官吏與府州司縣官吏人
等以百姓合納稅糧通同攬納接受折價飛鈔者十石
以上各刺面杖一百七十石以下九十七官吏除名不
叙退閑官吏豪勢富戶行舖人等違犯者十石之上杖
九十七七十石之下八十七其舖糧官吏知情分受笞五
十七除名不叙有失覺察者監臨部糧官吏二十七府
州總部糧官吏一十七若能捕獲犯人者與免本罪若

倉官人吏等盜糶官糧與攬納飛鈔同論知情糶買十石以上杖一百七十石之下九十七其漕運官吏有失覺察者驗糧數多寡治罪其盜糶糧價結攬飛鈔追徵沒官正糧於倉官并結攬糶買人均徵還官 諸倉庫官吏人等盜所主守錢糧一貫以下決五十七至十貫杖六十七每二十貫加一等一百二十貫徒一年每三十貫加半年二百四十貫徒三年三百貫處死計贓以至元鈔為則諸物以當時價估折計之 諸倉庫官知

庫子攢曲斗脚人等侵盜移易官物匿不舉發者與犯人同罪失覺察者減犯人罪四等 諸倉庫錢糧出納所設首領官及提舉監支納以下攢典合干人以上互相覺察若有違法短少一體均陪任內收支錢糧正收倒除皆完方許給由 諸典守鈔庫官已倒昏鈔不用退印答五十七解見任提調官失計點答一十七並記過名 諸鈔庫官輒以自己昏鈔詭名倒換者答三十 七記過 諸平準行用庫倒換昏鈔多取工墨錢庫官

知而不曾分贓者減一等並解職別叙主謀又受贓者以枉法論除名不叙 諸白紙坊典守官私受桑楮皮折價者計贓以枉法論除名不叙仍追贓收買本色還官 諸京倉受糧部官董之外倉收糧州縣長官董之收不如法致腐敗者按治官通究之 諸倉官委任親屬為家丁致盜糶官糧者笞五十七解職殿叙同僚相容隱四十七解職 諸倉官輒翻釘官斛多收民租主謀者笞五十七同僚初不知情既知而不能改正者三

十七並解職別叙 諸京師每日散糶官米人止一斗
權豪勢要及有祿之家輒糶買者答二十七追中統鈔
二十五貫付告人充賞 諸官局造作典守輒尅除材
料者計贓以枉法論除名不叙 諸運司辦課官取受
事發辦課單日追問受代離職者就問之 諸鹽場官
勘問犯人致死者從轉運司差官攝其職發犯人歸有
司 諸稅務官輒以民到務文契枉作匿稅私其罰錢
者以枉法論除名不叙 諸財賦總管淘金提舉司存

雖有護持制書事應糾劾者監察御史廉訪司準法行之
諸守庫藏軍官夜不直宿致有盜者笞二十七還
職捕盜不獲者圍宿軍官軍人追陪所失物貨俟獲盜
徵贓給還若遇強劫軍官軍人力所不及者不在追斷
之限 諸雜造局院輒與諸人帶造軍器者禁之 諸
兩浙財賦府隸徽政者掌治錢穀造作歲終報成以次
年正月至于二月從廉訪司稽其文書違者糾之 諸
有司橋梁不修道塗不治雖修治而不牢强者按治及

監臨官究治之 諸有司不以時修築隄防霖雨既降
水潦並至漂民廬舍溺民妻子為民害者本郡官吏各
罰俸一月縣官各笞二十七典史各一十七並記過名
諸漕運官輒拘括水陸舟車阻滯商旅者禁之 諸

漕運官輒受賊縱水手人等以稻糠盜換官糧者以枉
法計賊論罪除名不叙 諸海道都漕運萬戶府所轄
千戶已下有罪萬戶問之萬戶有罪行省問之徇情者
監察御史廉訪司察之漕事畢然後廉訪司考其案牘

諸海道運糧船戶盜糶官糧詐稱遭風覆沒者計賊刺斷雖會赦仍刺之 諸使臣行李托克托和斯及驛吏輒搜檢者禁之 諸使臣行橐過重壓損驛馬托克托和斯與使臣交贈為好不以法稱盤者笞二十七記過 諸急遞鋪輒開所遞實封文書妄入無名文字者笞五十七 諸急遞鋪每上下半月府州判官縣主簿親臨檢視所遞文字但有稽違磨擦沉匿鋪司鋪兵即驗事重輕論罪各路正官一員總之廉訪司察之其有

弗職親臨官初犯笞一十七再犯加一等三犯呈省別
議總提調官減親臨官一等每季具申上司有無稽違
仍於各官任滿日解由開寫而黜陟之 諸使臣輒騎
壞駒馬者取與各笞五十七及以車易馬者俱坐之
諸公主下嫁迎送往還並不得由傳置 諸使臣在城
輒騎占驛馬者禁之違者罪之 諸驛使在路奪回馬
易所乘馬馳至死者償其直若以私事故選良馬馳至
死者笞二十七仍償其直 諸使臣多取分例笞一十

七追所多還官記過使還人員除軍情急務外日不過
三驛驛官仍於關文標寫起止程期違者各答二十七
再犯罷役 諸乘驛使臣或枉道營私橫索祇待或訪
舊逸遊餓損馬乘並申聞斷治 諸使臣枉道馳驛者
答五十七托克托和斯擅依隨給驛者依例科罰 諸
驛使詐改公牒多起馬者杖八十七其部押官馬輒夾帶
私馬多取草料者并沒入其私馬 諸朝廷軍情大事
奉旨遣使者佩以金字圓符給驛其餘小事止用御寶

聖旨諸王公主駙馬亦為軍情急務遣使者佩以銀字
圓符給驛其餘止用御寶聖旨若濫給者從臺憲糾察
之 諸高麗使臣所帶徒從來則俱來去則俱去輒留
中路郡邑買賣者禁之易馬出界者禁之 諸出使官

員所至輒受官吏筵宴及官吏輒相邀請並從風憲糾
察 諸使臣所過州縣無故不得入城有故入城者止
於公館安宿輒宿於官民之家者從風憲糾之 諸遣
使開讀詔書所過州郡就便開讀者聽非所經由而輒

往者禁之若本宗事須親往者不在此限 諸使臣所
至之處有親戚故舊禮應追往者聽 諸受命出使還
匿給驛文字符節及錫貢之物久不進者杖六十七記
過 諸進表使臣五日外不還職托故稽留他有營者
止所給驛籍其姓名罷黜之 諸出使郡國使事之外
毋有所與有必須上聞者實封以聞 諸銜命出使輒
將有司刑囚審斷者罪之 諸奉使循行郡縣有告廉
訪司官不法者若其人嘗為風憲所黜罷則與監察

御史雜問之餘聽專問 諸官吏公差輒受人賕行禮

物者隨事論罪官還職吏發隣道貼補 諸捕盜境內

若失過盜賊却獲他境盜賊許令功過相補如獲他境

強盜或偽造寶鈔二起各准境內強盜一起無強者准

竊盜二起如獲竊盜准亦如之如境內無失但獲強竊

盜賊依例理賞若應捕之人及事主等告指捕獲者不

賞 諸捕盜官不得差遣違者臺憲官糾之 諸捕盜

官任內失過盜賊除獲別境盜準折外三限不獲強盜

三起竊盜五起各笞一十七強盜五起竊盜十起各笞二十七強盜十起竊盜十五起各笞三十七鎮守軍官一體捕限者同罪親民提控捕盜減罪二等其限內獲賊及半者免罪若諸人獲盜應賞者賞之 諸南北兵馬司職在巡警非違捕逐盜賊輒理民訟者禁之 諸南北兵馬司罪囚八十七以下決遣應刺配者就刺配之 諸各路在城錄事錄判分番巡捕若有失盜止坐巡捕官 諸職官非應捕之人告獲反賊者陞二等用

諸告獲強盜每名官給賞錢至元鈔五十貫竊盜二
十五貫親獲者倍之獲強盜至五人與一官 諸捕獲
弑逆兇徒比獲強盜給賞 諸隨處鎮守軍官軍人親
獲強竊盜賊者減半給賞 諸郡城失盜一年不獲者
勒巡軍賠償所盜財物其敢差占巡軍者禁之 諸捕
盜官捕獲強竊盜賊不即牒發淹禁死亡者杖七十七
罷職 諸盜牛馬悔過放還者以竊盜已行不得財論
不徵倍贓賞錢有司輒以常盜刺斷者以刑名違錯科

罰、諸捕盜官輒受人遞至匿名文字枉勘平人為盜致囚死獄中者杖九十七罷職不叙正問官六十七降先職二等叙首領官笞四十七注邊遠一任承吏杖六十七罷役不叙主意寫匿名文書者杖一百七流遠遞送匿名文書者減二等受命主事遞送者減三等諸捕盜官搜捕逆賊輒將平人審問蹤跡乘怒毆之邂逅致死者杖六十七解職別叙記過徵燒埋銀給苦主諸捕盜官受財故縱賊囚者與犯人同罪已敗獲者徒

杖並減一等 諸父有罪不坐其子兄有罪不坐其弟
諸大宗正府理斷人命重事必以漢字立案牘以公
文移憲臺然後監察御史審覆之 諸有司非法用刑
者重罪之已殺之人輒鬻割其肉而去者禁之違者重
罪之 諸鞠獄不能正其心和其氣感之以誠動之以
情推之以理輒施以大披挂及王侍郎繩索并法外慘
酷之刑者悉禁止之 諸鞠問罪囚除朝省委問大獄
外不得寅夜問事庶訪司察之 諸各路推官專掌推

鞠刑獄平反冤滯董理州縣刑名之事其餘庶務毋有
所與按治官歲錄其殿最秩滿則上其事而黜陟之凡
推官若受差不聞上司輒離職者亦坐罪 諸處斷重
囚雖叛逆必令臺憲審錄而後斬於市曹 諸内外囚
禁從各路正官及監察御史廉訪司以時審錄輕者斷
遣重者結案其有冤滯就糾察之 諸正蒙古人除犯
死罪監禁依常法有司毋得拷掠仍日給飲食犯真姦
盜者解束帶佩囊散收餘犯輕重者以理對證有司勿

執拘之逃逸者監收 諸奏決天下囚值上怒勿輒奏
上欲有所誅必遲回一二日乃覆奏 諸有司因公依
理決罰邂逅身死者不坐 諸累過不悛年七十以上
應罰贖者仍減等科決 諸犯罪二罪俱發以重者論
罪等從一若一罪先發已經論決餘罪後發其輕若等
勿論重者更論之通計前罪以充後數 諸職官輒以
微故乘怒不取招詞斷決人邂逅致死又誘苦主焚瘞
其屍者笞五十七解職別叙記過 諸鞠獄輒以私怨

暴怒去衣鞭背者禁之 諸鞫問囚徒重事須加拷訊
者長貳僚佐會議立案然後行之違者重加其罪 諸
弓兵祇候獄卒輒毆死罪囚者為首杖一百七為從減
一等均徵燒埋銀給苦主其枉死應徵倍贓者免徵
諸有司輒收禁無罪之人者正官並答一十七記過無
招枉禁致自縊而死者答三十七期年後叙 諸有司
輒將無辜枉禁瘐死者解職降先品一等叙 諸有司
承告被盜輒將警迹人非理枉勘身死却獲正賊者正

問官答五十七解職期年後降先職一等叙首領官及承吏各五十七罷役不叙均徵燒埋銀給苦主通記過名諸有司受財故縱正賊誣執非罪非法拷訊連逮妻子銜冤赴獄事未曉白身已就死正官杖一百七除名佐官八十七降二等離職叙仍均徵燒埋銀諸有司故入人罪若未決者及因自死者以所入罪減一等論入人全罪以全罪論若未決放仍以減等論諸故出人之罪應全科而未決放者從減等論仍記過諸

失入人之罪者減三等失出人罪者減五等未決放者
又減一等並記過 諸有司失出人死罪者笞五十七
解職期年後降先品一等叙記過正犯人追禁結案

諸有司輒將革前雜犯承問斷遣者以故入論 諸監

臨挾仇違法枉斷所監臨職官者抵罪不叙 諸審囚

官強復自用輒將蒙古人刺字者杖七十七除名將已

刺字去之 諸為盜並從有司歸問各投下輒擅斷遣

者坐罪 諸鬪毆殺人無輕重並結案上省部詳讞有

司輒任情擅斷者答五十七解職期年後降先品一等叙
諸禁囚因械梏不嚴致反獄者直日押獄杖九十
七獄卒各七十七司獄及提牢官皆坐罪百日内全獲
者不坐 諸罪在大惡官吏受賊縱令私和者罷之
諸司獄受財縱犯姦囚人在禁疎枷飲酒者以枉法科
罪除名 諸流囚強盜持仗不曾傷人但得財若得財
至二十貫為從不持仗不曾傷人得財四十貫為從及
竊盜割車剝房傷事主為從不曾傷事主但曾得財不

曾得財內有舊賊初犯齊喇司盜駝馬牛為從畧賣良
人為奴婢一人詐雕都省行省印套畫省官押字動支
錢糧干碍選法或妄造妖言犯上並杖一百七流尼魯
罕初犯盜駝馬牛為首及盜財三百貫以上盜財十貫
以下經斷再犯發塚開棺傷屍內應流者挑刺裨湊寶
鈔以真作偽再犯知情買使偽鈔三犯並杖一百七發
肇州屯種 諸犯罪流遠逃歸再獲仍流若中路遭亂
而逃不再犯及已老病并會赦者釋之 諸流囚居役

非遇元正寒食重午等節並勿給假 諸配役囚徒遇
閏月通理之 諸應徒流未行會赦者釋之已行未至
會赦者亦釋之 諸囚徒配役役所停罷者會赦免放
諸有罪奉旨流遠雖會赦非奏請不得放還 諸徒
罪盡則帶錄居役夜則入囚牢房其流罪發各處屯種
者止令監臨關防屯種 諸流遠囚徒惟女直高麗二
族流湖廣餘並流尼魯罕及取海青之地 諸徒流無
配役之所者發鹽司居役 諸主守失囚者減囚罪三

等長押流囚官中路失囚者視提牢官減主守罪四等
既斷還職 諸大小刑獄應監繫之人並送司獄司分
輕重監收 諸掌刑獄輒縱囚徒在禁飲博及帶刀刃
紙筆陰陽文字入禁者罪之 諸獄具枷長五尺以上

六尺以下濶一尺四寸以上一尺六寸以下死罪重二
十五斤徒流二十斤杖罪一十五斤皆以乾木為之長
濶輕重各刻誌其上紐長一尺六寸以上二尺以下橫
三寸厚一寸鎖長八尺以上一丈二尺以下鐐連環重

三斤筭大頭徑二分七釐小頭徑一分七釐罪五十七
以下用之杖大頭徑三分二釐小頭徑二分二釐罪六
十七以上用之訊杖大頭徑四分五釐小頭徑三分五
釐長三尺五寸並刊削節目無令筋膠諸物裝釘應決
者並用小頭具決筭及杖者屬受拷訊者屬若股分受
務令均停 諸郡縣佐貳及幕官每月分番提牢三日
一親臨點視其有枉禁及淹延者即舉問月終則具囚
數牒次官其在上都囚禁從留守司提之 諸南北兵

馬司每月分番提牢仍令提控案牘兼掌囚禁 諸鹽
運司監收鹽徒每月佐貳官分番董視與有司同 諸
內郡官仕雲南者有罪依常律土官有罪罰而不廢
諸左右兩江所部土官輒興兵相讎殺者坐以叛逆之
罪其有妄相告言者以其罪罪之有司受財妄聽者以
枉法論 諸土官有能愛撫軍民境內寧謐者三年一
次保勘陞官其有勲勞及應陞賞承襲文字至帥府輒
非理疏駁故為難阻者罷之

祭令

諸國家有事郊廟凡獻官及百執事之人受誓戒之後散齊宿於正寢致齊宿於祀所散齊日治事如故不弔喪問疾不作樂不判署刑殺文字不決罰罪人不與穢惡事致齊日惟祀事得行餘悉禁之 諸嶽鎮名山國家之所秩祀小民輒僭禮犯義以祈禱褻瀆者禁之

諸五嶽四瀆五鎮國家秩祀有常諸王公主駙馬輒遣人降香致祭者禁之 諸郡縣宣聖廟凡官員使臣軍

馬輒敢館穀於內有司輒敢聽訟宴飲於內工官輒敢
營造於內並行禁之諸書院同諸每月朔望郡縣長
吏率其叅佐僚屬詣孔子廟拜謁禮畢從學官升堂講
說其鄉村市鎮亦擇有學問德行可為師長者於農隙
之時以教導民其有視為迂緩而不務者糾之

學規

諸蒙古漢人國子監學官任內驗其教養出格生員多
寡以為陞遷博士教授有關從監察御史舉之其不稱

職者黜之坐及元舉之官 諸國子生悖慢師長及行
禮失儀言行不謹講誦不熟功課不辦無故廢學有故
不告輒出告假違限執事失悞愆戾鬪爭並委正錄糾
舉除悖慢師長別議叙者初犯戒諭再犯三犯酌量責
罰其厨人僕夫門子常切在學供給使令違者就便決
責 諸國學居首善之地六館諸生以次陞齊毋或躐
等其有未應陞而求陞及曾犯學規者輕者降之重者
黜之其教之不以道者監察御史糾之 諸國子監私

試積分生員其有不事課業及一切違戾規矩初犯罰一分再犯罰二分三犯除名已補高等生員其有違戾規矩初犯殿試一年再犯除名並從學正錄糾舉正錄知見不糾舉者從本監議罰在學生員歲終實歷坐齋不滿半周歲者並除名除月假外其餘告假不用準算學錄歲終通行考較漢人生員三年不能通一經及不肯篤勤者勒令出學諸奎章閣授經郎生員每月朔望上弦下弦給假四日當入宿衛者給假三日餘有故

須請假者於授經卽稟說附厯給假無故不入學第一次罰當日會食第二次於師席前罰拜及當日會食第三次於學士院及師席前罰拜及當日會食三次不改奏聞懲戒黜退 諸隨路學校計其錢糧多寡養育生徒提調正官時一詣學督視必使課講有程訓迪有法賞勤罰惰作成人材其學政不舉者究之 諸教官在任侵盜錢糧荒廢廟宇教養無實行止不臧有忝師席從廉訪司糾之任滿有司輒朦朧給由者究之 諸贍

學田土學官職吏或賣熟為荒減額收租或受財縱令
豪右占佃陷沒兼并及巧名冒支者提調官究之 諸
貧寒老病之士必為衆所尊敬者保申本路體覆無異
下本學養贍仍移廉訪司察之但有冒濫從提調官改
正 諸各處學校為講習作養之地有司輒侵借其錢
糧者禁之教官不稱職者廉訪司糾之 諸在任及已
代教官輒攜家入學褻瀆居止者從廉訪司糾之 諸
各路醫學大小生員不令坐齋肄業有名無實及在學

而訓誨無法課講鹵莽苟應故事者教授正錄提調官
罰俸有差 諸醫人於十三科內不能精通一科者不
得行醫太醫院不精加考試輒以私妄舉充隨朝太醫
及內外郡縣醫官內外郡縣醫學不依法考試輒縱人
行醫者並從監察御史廉訪司察之

軍律

諸軍官離職屯軍離營行軍離其部伍者皆有罪 諸
軍官不得擅離部署赴闕言事有必合言者實封附遞

以聞 諸隨處軍馬有久遠營屯或時暫經過並從官
給糧食輒妨擾農民阻滯客旅者禁之 諸臨陣先退
者處死 諸統軍捕逐寇盜分守要害約相為聲援稽
留失期致殺死將士仍不即追贖者處死雖會赦罷職
不叙 諸軍民官鎮守邊陲帥兵擊賊紀律無統變易
號令背約失期形分勢格致令破軍殺將或未戰逃歸
或棄城退走復能建招徠之功者減其罪無功者各以
其罪罪之 諸防戍軍人於屯所逃者杖一百七再犯

者處死若科定出征逃匿者斬以徇 諸軍戶貧乏已
經存恤而復逃者杖八十七發遣當軍隱藏者減二等
兩隣知而不首者又減隱藏罪二等 諸軍戶告乏求
替者從有司覆實之其詐妄者廉訪司究之 諸各衛
扈從漢軍每戶選練習壯丁一人常充仍於貼戶內選
兩人輪番供役其有故必合替換者自萬戶及千百戶
相視所換之可用然後用之百戶千戶萬戶私換者驗
名數多寡論罪解降 諸管軍官吏受錢代替軍空名

者驗入已錢數以枉法科論除名令兄弟子姪驅丁代替者驗名數多寡論罪解降 諸軍馬征伐擄掠良民兇徒射利畧賣人口或自賊殺或以病亡棄屍道路暴骸溝壑者嚴行禁止

戶婚

諸匠戶子女使男習工事女習黼黻其輒敢拘刷者禁之 諸係官當差人戶非奉朝省文字輒投充諸王及各投下給使者論罪 諸僧道還俗兄弟析居奴放為

良未入于籍者應諸王諸子公主駙馬毋拘藏之民有
敢隱藏者罪之 諸庶民有妄以漏籍戶及土田於諸
王公主駙馬呈獻者論罪諸投下輒濫收者亦罪之
諸官吏占人戶供給私用者治罪 諸有司治賦歛急
致貧民鬻男女為輸者追還所鬻男女而正有司罪價
勿償 諸生女溺死者沒其家財之半以勞軍首者為
奴即以為良有司失舉者罪之 諸民戶流移所在有
司起遣復業輒以拉木伊克人收之者禁之 諸鰥寡

孤獨老弱殘疾窮而無告者於養濟院收養應收養而不收養
不應收養而收養者罪其守宰按治官糾察之 諸被
災流民有司招諭復業其年深不能復業及失所在者
蠲其賦輒抑民包納者從臺憲糾之 諸年穀不熟人
民轉徙所至既經賑濟復聚黨持仗剽劫財物毆傷平
民者除孤老殘疾不能自贍任便居住有司依前存養
其餘有子弟者驗其家口計程遠近支與行糧次第押
還元籍沿路復為民害者從所在有司斷遣

諸蒙古回回契丹女直漢人軍前所俘人口留家者為
奴婢居外附籍者即為良民已居外復認為奴婢者沒
入其家財 諸收捕叛亂軍人掠取生口並從按治官
及軍民官一同審閱實為賊黨妻屬者給公據付之無
公據者以掠良民之罪罪之 諸羣盜降附以所刼掠
男女充收捕官饋獻者勿受仍還為民無親屬可收係
者使男女相配聽為民其留賊所者悉縱之 諸收到
被掠婦人忘其鄉里并無親屬可歸者有司與之嫁聘

所得聘財與資粧束 諸軍民官輒隱藏降附人民不
令復業者罪之 諸籍沒人口元主私典賣者追收入
官徵價還主 諸投下官員招占已籍係官民匠戶計
者沒其家財所占戶歸本籍 諸投下所籍戶令出五
戶絲餘悉勿與其有橫斂於民從憲臺究之 諸願棄
俗出家為僧道若本戶丁多差役不闕及有兄弟足以
侍養父母者於本籍有司陳請保勘申路給據簪剃違
者斷罪歸俗 諸河西僧人有妻子者當差發稅糧鋪

馬次舍與庶民同其無妻子者蠲除之 諸父母在分
財異居父母困乏不共子職及同宗有服之親鰥寡孤
獨老弱殘疾不能自存寄食養濟院不行收養者重議
其罪親族亦貧不能給者許養濟院收錄 諸典賣田
宅從有司給據立契買主賣主隨時赴有司推收稅糧
若買主權豪官吏阿徇不即過割止令賣主納稅或為
分派別戶包納或為立詭名但受分文之贓笞五十七
仍於買主名下驗元價追徵以半沒官半付告者首領

官及所掌吏斷罪罷役 諸典賣田宅須從尊長書押
給據立帳歷問有服房親及隣人典主不願交易者限
十日批退違限不批退者答一十七願者限十五日議
價立契成交違限不酬價者答二十七任便交易親隣
典主故相邀阻需求書字錢物者答二十七業主虛張
高價不相由問成交者答三十七仍聽親隣典主百日
收贖限外不得爭訴業主欺昧故不交業者答四十七
親隣典主在他所者百里之外不在由問之限若違例

事覺有司不以理聽者者監察御史廉訪司糾之 諸
軍官軍人不歸營屯到任官員不歸官舍往來使臣不
歸館驛輒於民家居止為民害者行省行臺起遣究治
到任官無官舍出私錢僦居者聽 諸造謀以已賣田
宅誣買主占奪脅取錢物者計贓論罪仍紅泥粉壁書
過于門 諸婚田訴訟必於本年結絕已經務停而不
結絕者從廉訪司及本管上司正官吏之罪累經務停
而不結絕者即與歸結不在務停之限違者罪亦如之

其所爭田內租入納稅之外並從有司收貯斷後隨田
給付 諸以女子典雇於人及典雇人之子女者並禁
止之若已典雇願以婚嫁之禮為妻妾者聽 諸受錢
典雇妻妾者禁其夫婦同雇而不相離者聽 諸受財
嫁賣妻妾及過房弟妹者禁 諸乞養過房男女者聽
轉賣為奴婢者禁之奴婢過房良民者禁之 諸守宰
抑取部民男女為奴婢者杖七十七期年後降二等雜
職叙 諸妄認良人為奴非理殘虐者杖八十七有官

者罷之 諸訴良得實給據居住候元籍親屬收領無
親屬者聽令自便 諸奴婢背主在逃杖七十七 諸
男女議婚有以指腹割衿為定者禁之 諸嫁娶之家
飲食宴好求足成禮以華侈相尚暮夜不休者禁之
諸男女婚姻媒氏違例多索聘財及多取媒利者諭衆
決遣 諸女子已許嫁而未成婚其夫家犯叛逆應沒
入者若其夫為盜及犯流遠者皆聽改嫁已成婚有子
其夫雖為盜受罪勿改嫁 諸男女既定婚其女犯姦

事覺夫家欲棄則追還聘財不棄則減半成婚若夫家
輒詭以風聞姦事恐脅成親者答五十七離之 諸遭
父母喪忘哀拜靈成婚者杖八十七離之有官者罷之
仍沒其聘財婦人不坐 諸服內定婚各減服內成親
罪二等仍離之聘財沒官 諸有女許嫁已報書及有
私約或已受聘財而輒悔者答三十七更許他人者答
四十七已成婚者五十七後娶知情者減一等女歸前
夫男家悔者不坐不追聘財五年無故不娶者有司給

據改嫁

諸有女納婿復逐婿納他人為婿者杖六十

七後婿同其罪女歸前夫聘財沒官

諸職官娶娼為

妻者笞五十七解職離之

諸有妻妾復娶妻妾者笞

四十七離之在官者解職記過不追聘財

諸先通姦

被斷復娶以為妻妾者雖有所生男女猶離之

諸轉

嫁已歸未成婚男婦者杖六十七婦歸宗聘財沒官

諸受財以妻轉嫁者杖六十七追還聘財娶者不知情

不坐婦人歸宗

諸以書幣娶人女為妾復受財轉嫁

他人者答五十七聘財没官妾歸宗有官者罪之 諸

僧道悖教娶妻者杖六十七離之僧道還俗為民聘財

没官 諸典賣佃戶者禁佃戶嫁娶從其父母 諸兄

收弟婦者杖一百七婦九十七離之雖出首仍坐主婚

答五十七行媒三十七 諸居父母喪姦收庶母者各

杖一百七離之有官者除名 諸漢人南人父沒子收

其庶母兄沒弟收其嫂者禁之 諸姑表兄弟嫂叔不

相收收者以姦論 諸奴收主妻者以姦論強收主女

者處死 諸為子輒以亡父之妾與人人輒受而私之
與者杖七十七受者笞五十七 諸受財強嫁所監臨
妻以枉法論杖七十七除名追財沒官妻還前夫 諸
良家女願與人奴為婚者即為奴婢娶良家女為妻以
為奴婢賣之者即改正為良賣主買主同罪價沒官
諸以童養未成婚男婦轉配其奴者笞五十七婦歸宗
不追聘財 諸逃奴有女嫁為良人妻已有男女而本
主覺察者追其聘財歸本主婦人不離 諸棄妻已歸

宗改嫁者從其後夫

諸棄妻改嫁後夫亡復納以為

妻者離之

諸夫婦不相睦賣休買休者禁之違者罪

之和離者不坐

諸出妻妾須約以書契聽其改嫁以

手模為徵者禁之

諸婦人背夫棄舅姑出家為尼者

杖六十七還其夫

諸賣買良人為娼賣主買主同罪

婦還為良價錢半沒官半付告者或婦人自陳或因事

發覺全沒入之良家婦犯姦為夫所棄或娼優親屬願

為娼者聽

諸娼女孕勒令墮胎者犯人坐罪娼放為

良 諸勒妻妾為娼者杖八十七以乞養良家女為人
歌舞給宴樂及勒為娼者杖七十七婦人並歸宗勒奴
婢為娼者笞四十七婦人放從良 諸受財縱妻妾為
娼者本夫與姦婦姦夫各杖八十七離之其妻妾隨時
自首者不坐若日月已久纔自首者勿聽



元史卷一百三

元史卷一百三考證

刑法志二從廉訪考閱之 按考原刻訛者今據永樂

大典改

刑法志二枉作匿稅 按稅字下原刻重一稅字今據

文義刪

刑法志二諸有司承告被盜輒將警迹人非理枉勘身

死却獲正賊者正問官笞五十七解職 按警原刻

訛景考官民準用凡強盜免死竊盜再犯皆刺字籍

充警迹人令村坊常切檢察遇出處經宿或移他所
報隣右知至正條格亦同今據改

刑法志二諸土官原刻訛上官今據文義改又此條誤
與上文連為一條今改空一格

刑法志二散齊宿於正寢致齊宿於祀所 按致齊句
原刻脫宿字今據文義增

刑法志二餘者初犯戒諭再犯三犯酌量責罰 按諭
原刻訛論酌原刻訛約今據文義改